

四庫全書

集部

欽定四庫全書

集部
運覽漫稿卷三
四

詳校官編修_臣翟槐

中書_臣劉源溥覆勘

總校官庶吉士_臣何思鈞

校對官中書_臣李荃

謄錄舉人_臣孫炯

欽定四庫全書

運甓漫稿卷三

明 李昌祺 撰

五言律詩

登天華觀

玉洞開仙館，丹梯軼世氛。
天書餘鳥篆，雲笈護龍文。
靈境蕭臺近，空歌下界聞。
俗人如可避，不必問桃源。

春日山中尋泉

春泉試獨尋度壑復穿林忽見流紅遠方知入翠深
色
渾因悟雨聲淡只宜琴盥弄忘歸去窮源空有心

擬唐塞下曲八首

沙塵漲北天衛霍出居延苦霧埋沙磧窮荒乏水泉
戰
酣輦鼓壯戎久鐵衣穿試上長城望中原若箇邊

羽箭鴈翎刀風沙北地豪弓開關月滿鵬沒陣雲高
勁
騎三邊出匈奴一夕逃將軍方得意新拜璽書褒

鐵騎蹴交河銜枚半夜過雪花凝鎖甲月色冷雕戈小

醜俱亡命連營盡凱歌至今青塚骨猶恨與通和

十五去防秋于今已白頭一身猶是卒諸將久封侯部
伍嫌羸病親知識壯遊寒燈孤戍裏揮淚看吳鉤

久在邊城裏風霜不可論六親皆骨朽百戰偶身存烽
燧連天暗沙塵憚日昏征人家萬里誰弔國殤魂

犬戎窺近塞羽檄發精兵不識沙場苦焉知性命輕饑
鷹投古壘疲卒卧空營日暮轅門裏愁聽鼓角聲

塞馬嘯悲風旌旗慘澹中衛青持左鉞李廣在前鋒壯

士俱亡命朝廷重論功將軍承寵詔天子錫新封
秋霜劍在腰曾事霍嫖姚諸將威無敵全軍氣不驕弓
鳴驚過鴈砲響走樓貂敢憚窮邊苦天家雨露饒
大漠陰山外霜天氣候殊陰沙明遠燐寒日慘窮廬北
闕無來使中原少得書凱歌今未奏壯士誓捐軀

病起遣興

羸弱怯衣單徐行覺尚難平和欣脉復疎懶喜身閒古
硯從教洗孤琴久未彈朝衣如可解歸去卧秋山

送人南歸四首

離絃兼楚調忍向醉時開連歲長爲客他鄉更別君鷗
波明夕照鴈字寫秋雲迢遞還鄉夢相隨過海門

百年同旅寓大半在殊方白髮羞明鏡青山問故鄉落
霞秋水濶新鴈暮天長安得隨君往溪南訪草堂

候館停杯處扁舟欲發時歸帆投遠浦斜日隱層厓暑
退秋來早潮生月上遲經行逢勝槩都付酒兼詩

年年長在客北薊復南京秋雨滄洲鴈春風采石鷺好

山環故里流水背孤城去住無拘繫閒身到處輕

夜坐彭贊禮竹塢二首

獨坐依修竹秋聲近戶多疎鍾清禁涼露濕銀河野
飯思薇蕨儒衣想芟荷小山招隱意藁挂有遺歌

靜夜涼風動林疎宿鳥驚玉繩低萬戶銀漢轉三更露
重絺衣薄香浮茗碗清班姬紈扇曲此際最關情

送沈太守之雲南

滇陽南望迥五馬引雙旌鳥道雲邊斷猿聲月下清黔

江通遠海楚樹擁孤城已是諸侯貴毋論萬里行

送謝明府之桃源

楚地佳山水桃源境更幽汀蘭行處採湘水抱村流門
掩山城暮蟬鳴驛樹秋昔人遺洞在騎馬一來遊

紅葉

染樹初凝茜連林漸積丹露蘂消黛色霜片妬朱顏菊
避重陽艷花羞二月殷娥眉爭拾取題字寄人間

送周編修姪還文江

落景照離筵華音促別絃老親長日念遊子幾時還玉
雪中郎貴青春小阮賢重來拾瑤草遲爾五雲邊

送王僉事之湖廣

江漢維南紀星辰近太微地分方嶽重官到憲臺稀遠
水連秋濶輕帆徹夜飛人生驄馬貴好是繡爲衣

寄劉三髦五首

劉子窮經處柴門野水濱俗人那可到往哲自相親道
在寧論命家空不歎貧幽棲如可遂遲子結南隣

吾愛劉公子渾如漢士風古心真自得高操更誰同綠
水溪邊舫朱絃膝上桐我慚簪組累不得遠相從

濯足清潭裏移家碧澗邊非關傲軒冕自是愛林泉野
鶴閒同往溪雲靜與還東山謝安石何日起高眠

才俊青雲早嗟君獨出遲寧甘身未達不與世相知霜
月隣僧磬涼風野客棋懷人在天末無地寫幽思

剡書多日下猶卧碧山隈只歎相如病空淹賈誼才窓
虛雲自宿門掩鶴初回好在禾川上應愁驛騎催

題世德樓

高樓無四隣
闌檻逼秋旻
創造懷先代
登臨屬後人
水雲供遠眺
山月共清貧
羨爾丘中士
雲霄寄此身

送王知州赴祿勸

行盡天涯路
黔南尚幾州
孤城藏萬壑
殘月在扁舟
劍閣雲邊斷
巴江樹杪流
兩回經鳥道
應記舊曾遊

送梁僉事還蜀二首

臘盡催行色
天涯起別愁
暮雲遮雨濕
寒水帶冰流
鳥

道青驄馬烏臺紫鬃裘漢廷諸俊彥風裁范滂優
行人冒曉霜白簡繡衣裳復任辭三殿觀風動一方秋
林黃葉暗春水碧芹香杜子留遺跡煩君訪草堂

送劉教諭還沛縣

相望渾未遠相會竟難常交態貧如故離情醉慙忘淮
流通海近豐樹入雲長羨爾官非賤橫經漢祖鄉

送人還永豐二首

迢遞京華道蕭條歲晏時江風寒釀雪淮水夜流澌遠

浦帆來小殘鍾鳥去遲
瀧岡天下重歐子有穹碑
臘盡促歸橈離魂黯欲消
故園頻在望知己邈難招
燈火江村市梅花野岸橋
行邊憐寂寞況值雨蕭蕭

送鄧宗經還永新訓導二首

相逢疑是夢乍見總堪憐
良會來天上長貧在客邊
青雲違故舊華髮感流年
明發征帆去依然各一天

十載留京國三年別故人
賈生猶未達鄭老尚貧燈
火費宮夕菰蒲野水春
誰知他域別淒斷更傷神

寄蕭教諭三首

見說崑山縣孤城在水鄉
汐潮通海近雲樹接吳長
夏暑圩田熟秋陰學舍涼
年年春色裏桃杏爛宮牆

縣齋蒲葦裏鷗鷺與相親
衆水春環舍孤峰晚對人
海鮮便久客儒服稱閒身
肯念同袍者緘書莫厭頻

身名俱未達朋舊故應疎
多病惟高枕何人慰索居
縱鱗思曠野疲馬倦長途
誰似儒官好優游翰與觚

耕樂亭二首

孤亭臨夏野空濶四無隣車馬來遊少農夫就餉頻晴
簷鳩喚雨社甕鳥啼春竊祿真何補投簪媿野人

苔痕臨水潤樹葉近秋稀細雨羣農集殘陽一鳥歸村
童收滯穗野老候空扉亦有躬耕意青莎擬製衣

送人還永豐三首

君家簪綬裔羣從玉連枝遊子龍頭貴中郎燕領姿雙
尊論久別千里慰遐思六一遺風在懷哉百世師

行李歸期促山川去路遙疾風狂入夜淫雨晦連朝帆

逐孤飛鳥江通逆上潮憑將棲遁意鄉國寄漁樵
候館促離杯愁顏且強開砌蛩驚露泣巢燕避秋回菊
徑深黃葉衡門掩綠苔緬懷西漢士據地獨奇才

郊祀齋宿彭太常永年公署二首

寂歷容臺署高吟逸興生泉香春井溢鐘斷夜堂局清
漏隨風度流雲傍月行甍來猶愛此住久轉忘情

竹靜風停後瓶香茗熟時燈寒人未寢露冷鶴偏知頗
愛良宵靜翻嫌白日遲年年此齋宿載誦我將詩

太廟孟秋時享同陸員外齋宿

槐露滴新秋齋房夜色幽罷琴期月上捲幔見星流池
冷菰蒲靜窓寒竹樹稠清宵容易盡香茗且淹留

喜張進士叔豫見宿旅舍

窮巷寂無隣青燈共故人遠聲霜下磬孤影客邊身露
冷蛩相弔庭寒月自親殷勤一瓢酒更與話酸辛

碧峰寺慎公房

碧嶂屏風秀清流束帶圓烟霞醒醉夢鐘梵寤僧禪亂

葉當人落孤雲引鶴還聲聞如可契應此息塵緣

謝賜西洋布

異縷何纖細輕盈玉雪紉鮫宮初織罷海國遠輸來捧
拜榮恩賜紉縫稱體裁微軀增照耀被服媿非才

竹所二首

何地偏多竹脩脩庭院幽夜涼難得月雨過易成秋不
厭貧家看那妨好客留綠陰多處坐疑泛渭川舟

王子幽棲地蕭森修竹林好風催布席疎雨罷鳴琴天

籟醒塵夢涼陰伴醉吟幾竿渾不俗賴爾悅閒心

送曹判官蘇州治水二首

別駕之官日都城欲夏過一篷畿甸雨雙槳石湖波郭
外青山少城邊白水多三吳民墊久拯援術如何

聞道姑蘇郡東南近海潮圩田多夏潦場圃減秋苗平
易遵前訓煩苛革舊條更應持潔慎玉帛此鄉饒

詠蝶

栩栩戲晴光留連媚露香舞隨花片白棲共柳絲黃樹

抄鶯捎急簾間扇撲忙南園芳草地撩亂逐蜂狂

寓舍梅一株翳榛莽中詩以唁之

篠蔓翳頽垣娟然玉雪痕寒香偏晚節春色自名園
鳥啄梢頭葢苔沿砌下根猶能異桃李不在狄公門

席上贈妓

綰霧纖纖指凌波小小蓮春山銀燭下秋水玉尊前
舞袖鴛鴦錦歌珠玳瑁筵座間俱狎客惟屬杜樊川

送陳生歸吉水赤岸二首

清砧兼落葉總是別離情去路千程遠歸舟一葉輕秋
雲連樹暗寒日映川明亦有滄浪興何時共濯纓
歸心無日夜孤舫不停牽沙鱗寒綠草江豚暝觸船銀
河通赤岸翠壁瀉紅泉莫戀幽居好功名貴壯年

送周秀才遊長沙

迢遞長沙道蕭條晏歲遊亂山黃葉寺孤棹白蘋洲夕
鳥衝船過寒波背郭流毋論卑濕地賈傅昔曾留

送周布政還河南

出鎮名藩重來朝異眷隆殘年將欲盡知己忽相逢泥
淖梁園雨埃塵良嶽風旬宣如有暇煩弔宋遺宮

靈谷寺

一徑入青松樓臺峙化宮雨深山果落雲去石床空樹
老多巢鶴潭清或見龍上方禪寂地甃得寄塵蹤

南溪書屋

松竹連村暗軒窓面水清蘚痕留屐齒灘響雜書聲行
藥因過寺輸租甃到城靜觀簪紱累還喜布衣輕

周原幽居

山色蛾眉秀江流燕尾分
亂蟬吟落葉獨鶴引歸雲
黃葉溪邊樹青帘雨外村
興來留客坐隨意倒芳樽

送戴教授北行

別路三春雨行舟五兩風
花香隨路減柳色上衣濃
共是青雲客先成白髮翁
離情如逝水萬折亦朝東

送張巡檢之雲南

弓劍巡荒徼衣冠別上林
路經三峽險人到百蠻深
枸

醬醢夷俗兒童解焚音點蒼山色古道便一登臨

送人之京

上巳風光好新晴物色妍青山林下屋綠水鏡中船節
換榆烟花殘穀雨天壯遊逢勝景况覲五雲邊

送陳郎中重使西域十首

九重辭鳳闕千騎度龍荒寶劍懸秋水珠袍照雪霜泉
源隨地少沙磧亘天長人羨皇華使誰知粉署郎

天使下邊州青絲控紫騮風雲隨節旆雨露到氊裘斜

日羌城晚微風塞草秋壯心知未已萬里快重遊

逐水安營晚鳴笳渡磧遲穹廬無舊館行卷有新詩
駿骨天生馬奇毛地產獅蕃酋迎候處一曲漢歌詞

疊鼓雜鳴笳天風送使槎內臣金鏤帶壯士鐵爲撾去
路緣青海行營駐白沙單于爭慕義不用李輕車

驪馬紫金環行行出玉關懸河三寸舌積雪萬重山旗
影連雲卷弓弦向月彎封侯儒者事天子待君還

大漠連川遠行人去國遙烏孫遺種在狼望舊名消夜

雪戎王帳秋風使者輶懸知專對好談笑歎天驕
寶帶懸魚服雕弧掛馬韉皇恩覃萬國兵氣靜三邊瀚
海寒生月崖城暮鎖烟欲窮西域事班史有遺編
地勢三城遠河源二水分火山稀好雨鹽澤足寒雲鵬
沒平沙外駝鳴古澗潰憑高時引睇何處是中原

出塞春乘傳投鞭晚下營旋風邊馬疾掣電皂鵬輕浩
蕩窮源志迢迢奉使程支機如得石持往問君平

行盡伊吾道遙天氣候殊神僧留白骨毒草隱玄蛛近

水多行帳窮荒絕遠書貯看歸觀日玉勒控宛駒

送李生還安城

北薊辭嚴父南京別故人一身勤遠道千里念慈親柳
暗江城曉萍香野岸春燈花先報喜應更倚門頻

南京送高教授赴選

卿家本同郡客路又離羣夜柝敲寒月霜鐘度暝雲征
袍迷草色古嶼帶潮痕寥落分携處秋鴻不可聞

共是浮萍跡偏憐髣髴易新江湖留滯久朋舊別離頻試

數中朝士應多故里親
莫嫌羶獨冷年紀政青春

鷺渚輕鷗

芳洲白鷺名無數
白鷗輕暖戲桃花
水晴依柳絮萍飛
來兼早鴈散去避秋鴈
何處忘機客時於此濯纓

寄劉孟熙隱者

崑壑幽棲者閒情老不衰
露葵綠客折晚稻約僧炊
苔徑林風掃松窓嶺月窺
詩名兼逸興湖海萬人推

次衡州

征棹艤衡陽孤城堞雉荒流雲時翳日微雨暝生涼江
濶鷗波遠天空鴈字長採蘋無限興烟水晚蒼茫

己亥房山除夕營中作

殘臘中宵盡孤懷百感深已慚先哲訓徒抱古人心偃
息何由得勤勞敢不任寒燈照空榻擁褐謾愁吟

患難仍連歲蹉跎獨此身風塵雙短髻宇宙一窮人向
曙繁星沒凝寒積雪新椒花今夕酒誰壽白頭親

稚子捐深愛酸辛痛莫支坐愁侵骨髓行樂負心期風

俗殊方異人情近老悲前程驚馬足敢不慎驅馳
風雪當除夕空營一榻孤天涯悲舐犢地下憶童烏寧
復衰顏壯惟應淚眼枯大靈如不妄再拜謝玄夫

今夕猶常夕如何倍憶家二千里道四十五年華貧
有文章在官無品秩加遙知妻共女愁坐卜燈花

警柝嚴巡邏寒更獨坐聽淒其孤影瘦邪許萬聲停敗
壁風穿葦空庖凌在餅茫茫天壤內么麼一螟蛉

五峰菴住上人房

金史四庫全書
卷三
住公棲遯處重到只空臺竹榻無僧掃松關有客來夕陽寒鳥集涼露候虫哀祗苑猶如此何方免劫灰

雨中桃花

霖霖過芳園枝枝積淚痕色憐開處淡香愛墜時聞採
倦蜂鬚濕銜多鳥味芬東風解人意吹片到衡門

蕭芳桂挽詩四首

芳桂殞清秋無人不淚流通才今日少遺恨幾時休苔
蘚碑三尺楸梧土一丘鴈門前學士地下與嬉游

卜宅瀘江曲逢迎意最真竹軒觀奕倦花嶼放舟頻莫
究平生志先捐未老身最憐黃壤魄長夢綠窓人

豪傑空餘子尊賢眼倍青揮金資客醉闕館教兒經天
道幽難測親情痛不勝山陽懷舊笛幾度斷腸聽

有志惜無年香名遠近傳客情千斛酒歲計幾莊田吐
論常傾坐收書不吝錢善祥鍾令子酷似乃翁賢

庚戌三月三日服闋之京舟次吉水

漸老怯離鄉那堪道路長病身愁北去倦翮戀南翔旅

夢緣鐘斷憂懷藉酒忘低回愧江叟白首釣魚航

過清江

浦迥路迢迢汀花帶雨飄殘燈江上廟新水屋邊橋鷺宿爭投石鷗驚或避撓無因謝軒冕老作白雲樵

次洪都

春波拍岸平雙槳一舟輕燕麥偏傷雨鶯花已負晴荒亭徐孺宅遺堞灌嬰城北去南來客都緣利與名

彭澤縣石崖僧房

窓戶俯澄潭龍宮似可探
藤蘿棲鵲樹甌錫定僧岩
斜日疎疎磬長風去去帆
只應輸野衲長此卧烟嵐

早發小孤山過風

湖盡江逾濶舟行路若迷
垂楊春寂寂芳草雨淒淒
漩水竈鼉窟平沙鴈鶩堤
風波隨地有何處可幽棲

舟過南京

鍾阜白雲邊橋陵鎖暮烟
聖謨真遠矣王氣故依然
玉帛諸番會金湯萬世傳
誰陳根本計有力可回天

尉氏縣

縣舍隣溱洧門當綠野開禽巢堦下樹蝸篆壁間苔俗
質稀絃誦田荒剗草萊宋金酣戰處武穆獨奇才

宿興國寺

人靜鐘初斷肩輿到寺門風簷寒犬吠露井候蟲喧弱
蔓低垂樹枯蓬密覆垣蒲團分半席慙慙給孤園

宿端壁寺

遺構象王宮荒涼小邑東一燈秋殿閉孤榻夜窓空飢

噉床頭鼠愁吟砌下蛩蕭蕭黃葉墜庭樹顫西風

長葛道中

郊原殊蒼莽禾黍未全收桑柘千村晚粉榆四野秋空
林投倦鳥枯草斂疲牛淡靄輕烟外微茫見許州

次襄城

晨鐸語西風衣單怯露濃豆苗遮地黑柿實照園紅曉
色蒼茫裏秋光慘淡中永懷東漢士風裁李膺雄

晚至葉縣

擾擾道途間埃塵兩髻斑清風牛背笛斜日馬頭山荷
蓋擎殘綠榴房破嫩殷蘋花秋水岸空羨白鷗閒

王喬觀

王子飛鳬處仙遙跡尚存城荒生暮靄殿古鎖秋雲壞
壁燈烟暗間堦草氣薰古今爲縣者神異獨稱君

留魯山縣

黎庶凋殘甚惟餘樸儉風名因元子重地本魯王封撫
卹無賢令流移有情農誰將于蒹曲歌向五雲中

宿廢普濟寺

青山行欲盡深樹見僧房雲氣千峰暝秋聲一院涼
長藤懸破衲脫葉覆空廊龍象黃金地蕭蕭蔓草長

山中曉發

雲氣曉冥濛人行萬木中菊乾偏喜雨柳弱自愁風
綠鬢流年改丹心往日同明時叨重寄無補愧諸公

懷黃州滕太守

昔在南宮日仙郎總俊髦分符榮出牧載筆憶聯曹身

已朱旛貴名猶粉署高公餘頻弔古艤棹訪臨臯

逢索員外話舊

相見仍青盼相悲總白顛功名憐蹭蹬患難喜生全
小市三楹屋荒村數畝田南交同宦者若箇在林泉

內鄉縣

巖邑千山裏荒村戶半逃曉炊橡粟寒火藝蓬蒿深
秀非盤谷凋零類石壕自傷無善政撫問敢辭勞

新野即景

村暗濛濛雨清流淺淺溪菊花長帶濕豆莢半沾泥野
迥居民少林昏去路迷自投新野界蒿草與人齊

雨中赴唐縣

冒雨趨唐縣蓬蒿已厭看長途泥滑滑平地水漫漫
枵腹流民餒單衣稚子寒撫巡兼勞徠衰病敢求安

宿泌陽縣田舍

民家深樹裏下馬點燈時風雨關門早衣裳拜客遲
艱難逢歉歲逼迫後租期說到傷心處潸然淚滿頤

過光州望馬中丞墓

元運方全盛公文擅大家謹嚴真有法悃信無華故
里祠堂廢荒阡墓碣斜欲羞蘋藻薦不敢駐行車

懷元進士龔友孚

世運滄桑改公名汗簡留六軍憐駭散四海竟橫流徒
屈英雄策空遺社稷憂浮光垂白叟仍解說才猷

晚赴西平

晚涉西平境荒郊望欲迷暝烟村遠近寒樹塚高低驛

路通淮甸僧房隔汝溪栢亭何處是極目草萋萋

王侍讀汝嘉挽詩

識面嗟誠晚論交覺獨深麟經三世業蠹簡一生心諸
老憐將盡孤懷痛不禁遺絃空自絕無處覓知音

閤閱衣冠盛才名伯仲齊宮袍裁賜錦御酒拆封泥屢
握脩書筆頻分應制題只今文燄在猶自燭雲霓

少日邊庭戍曾馳草檄名談兵諸將屈較藝衆人驚已
並青城譽仍兼玉署榮九京那可作惻愴起深情

玉堂陪末議荏苒七年餘夜漏秋同聽春潮曉共超仲
淹空有策和靖却無書垂老交游盡臨風淚滿裾

宿舞陽開元寺

驅車巡郡邑夜夜宿僧房窓掩芭蕉雨鐘敲薜荔霜一
燈千慮集孤枕五更長無補惟宜退先塋有草堂

歸自南陽

去日猶秋暑歸時已冷霜江山非故里人物是他鄉老
態隨年出離愁共路長埃塵如見戀到處撲衣裳

經息縣

歲晏經新息晨征念路遙輕冰方盡合殘雪未全消行
客歸心切居民餒腹枵停車徒自感只合返漁樵

除日早飯田家

田家無節序除日亦尋常破釜初炊黍空槽旋壓漿甕
寒蠶結凌窓濕紙粘霜遠役如堪免長貧不敢傷

除夕宿汝寧僧舍聞停止夫役喜而有作

除夕留僧寺焚香對老禪青燈伴今夜黃曆換明年宵

肝憂誠切瘡痕痛暫蠲明晨呼萬歲頓首玉階前

過穀陵關

春盡穀陵道千山萬木中水聲泉聒聒雲氣雨濛濛嫩
草溪邊石幽禽樹杪風抱關黃髮吏寧解識終童

永思堂三首

一自雙親逝孤懷每自傷恍疑聞謦欬猶似見羹牆厚
祿嗟何及遺言敢暫忘番湖東去水不似此情長

人子思親意悠悠鎮不窮常時瞻畫像每日想音容幽

顯雖云異精誠或可通哀悰真罔極長繫寸心中
憶昔承歡日沉思痛倍饒夢魂勞夜夜淚眼濕朝朝
兒鬢霜頻積親塋樹幾凋山夷河可塞此恨未應銷

賦得驄馬送別

驄馬玉爲蹄行行過柳堤雲隨金絡轡花映錦障泥
流電雙瞳炯搖風一尾齊似知離別意欲去更頻嘶

題陳道士處靜軒

素性便孤寂無營晝掩關卧聞清露墜坐見白雲還
鶴

夢棋敲醒蝸牆蘚蝕殘仙瓢休掛樹風起厭喧煩
結宇汴城闔開門見市人輪蹄連旦暮烟火雜軍民向
鬧尋閒處隨緣寄幻身凡心如未泯林壑亦埃塵

虛室原生白寥寥一榻清石壇雲影度金掌露光凝叩
齒宮神集齋心道氣澄三尸能斬却鉛汞自然成
軒車從擾擾窓戶自幽幽藥徑人蹤絕苔階鶴跡留平
生雙短屐浮世一虛舟即此堪棲隱何須物外遊

春草二首

萼萼復萼萼征袍映欲迷
暖烟秦苑北寒食杜陵西
綠嫩羞鸚羽青柔襯馬蹄
南園新雨過畦菜曉爭齊
秀色遠相連柔香雨霽天
嫩兼蒲葉細濃奪柳條鮮
莫把征輪碾留教醉客眠
王孫行未返芳意自年年

晚登汴城

休騎上荒城斜陽萬感并
歲憐頻有旱雷恠久無聲
芳樹鳩巢廢香泥燕壘成
緬懷前宋士人艷道鄉名

郭外野寺

野寺遠人烟，
觚稜殿兀然。
瓦礫雙足折，
土偶半身全。
鳥去塔留篆，
蝸藏壁帶涎。
閭浮俱苦海，
何處可安禪。

立春日作

殘厯惟餘晦，
殊鄉又遇春。
壯懷灰共冷，
衰髯雪爭新。
頗覺逢迎懶，
徒思引退頻。
自緣忘物我，
何用辨玕珉。

聞舍弟昌復訃

聞訃心先折，
開緘淚若傾。
異鄉離別恨，
同氣死生情。
哽咽悲何已，
呻吟痛曷平。
九京知有憾，
弱子尚孩嬰。

曾共過庭前雙親獨爾憐
亢宗徒齋志閱世竟慳年
忍割今生愛難期再世緣
永懷諸弟妹三已重泉

五十年相聚俄驚一夢餘
酸辛身後事愁苦病中書
苔蘚沙場骨羅紈肉食軀
何如終牖下隨分塋郊墟

未病猶耽飲方強遽解紳
短脩元有定聚散本非真
蘚碣標荒塋桐棺掩幻身
達人曾裸塋那用更傷神

春祭陪祀東書堂賜茶退歸作

香篆半成灰齋宮賜坐回
苑花紅未拆堦草綠先催
棋

布星羅局茶傾雪泛杯非才叨岳牧明祀幾番陪

偶然作

謬忝藩維寄空慚老病身髣髴愁裏雪花柳客邊春直
道乖流俗餘生任化鈞時無鄒孟氏枉直向誰詢

三月四日即景

忽忽春將暮俄過三月三草誰憐益母花自媚宜男乍
到尋巢燕初眠上箔蚕新茶與新筍鄉味憶江南

合歡牡丹三首應教作

爛熳絢晴朝容華若賽嬌
辦多愁露浥幹弱怯風搖
共訝晨粧淡都緣宿酒消
更期千歲壽歲歲賞妖嬈
花艷奪霞紅葩分嫵媚同
鬪妍雲錦幄競秀綺羅縈
淑質俱傾國凡英盡歛容
內庭和氣盛卉草最先鍾
曉露濕芳英駢開耻獨榮
仙姿雙弄玉道韻兩飛瓊
人羨長偎倚天令巧合并
鵲巢風化美佳植固堪徵

合歡芍藥二首奉教作

名品擅維揚嫣然共頡頏
總專傾國艷難辨是誰香
窈窕

窈千般態娉婷一種粧螽斯端有兆宜爾預呈祥

樓子花王副根同蒂亦連固知皆雅淡孰敢別蚩妍
閣雲鬟並粧臺月貌聯暖風香霧裏向背總堪憐

題小景四首

南北兩峰前逢春物物妍露桃臨水岸烟柳隔江船
古廟尋嘉澤幽亭訪冷泉遊人都載酒來往六橋邊
芳樹垂巖暗藂篁傍石低虹流雙澗遠笏卓數峰齊
棋許高人對琴教小豎携湖山皆秀麗無處不堪題

窈窕洞無門寥寥隔世氛
板橋穿竹篠苔壁綴松根
孤嶂摩雲秀飛泉觸石喧
不知何道士收露點玄文
積素晃溪山人家盡掩關
客舟寒尚挽漁漿暝初還
老樹高低岸殘蘆曲折灣
欲投峰頂寺冰滑路難攀

和友人韻

山暗雲霾樹潮生水到門
野航乘一葦村釀醉孤尊
夜火燃松節晨餐煮芋根
自諳棲遯志富貴不須論

荷衣蘭作佩葯檻席爲門
淡泊幽情遠真淳古道尊
花

飄仁在核葉落液歸根消息盈虛理當從達者論
地險過牛渚林幽類鹿門戀茲耕釣樂忘却縉紳尊掃
石安茶竈携書坐竹根衰榮相倚伏天道妙難論

寄南昌沈大尹

杖屨歸田日山林養病時甄無陶令粟笈有杜陵詩蒲
柳身空老松筠性不移何由重會面相與話襟期
終日惟枯坐衡門掩薜蘿自緣知己少謾道識人多往
事心徒赤浮生鬢已皤久思食杞菊作賦續東坡

昔出別鄉親今還少四隣天留雙眼在人笑一身貧勇
退慚先哲相知感故人平生堅白意未肯涅緇塵

題終慕堂

舊隱金鰲下榕蕉間橘林他鄉頻引睇先壟鎮縈心世
澤溪流遠哀情海水深楹間懸鉅榜一顧一沾襟

自憐成永感那得再晨昏掛壁遺容在紉衣密綫存秋
霜心易愴春雨恨難論一脉書香遠相傳子又孫

燎黃褒典重純素此生孤長抱窮天痛仍懷永世圖祿

豐親不逮泣盡眼將枯子職知能勉移忠仰聖謨

運甓漫稿卷三

欽定四庫全書

運甓漫稿卷四

明 李昌祺 著

五言排律

送張叅政考績之京

瑣闥才名著藩垣位望隆三年叅省政千里獻民庸
寮案勤勞共兵氓愛慕同柳亭張餞席桃浪送征蓬
天上乘槎客江邊卧轍翁櫓聲搖落月帆勢快長風
浩蕩淮

流壯嶙峋岱嶽雄金臺紅日下貝闕綵雲中清慎聞羣
辟廉能徹九重陞陳嘉績最階授散官崇復職紆新眷
辭朝返舊封桓桓方叔烈戀戀子牟忠旣息憐諸郡旬
宣仗數公追呼鞭朴少飽暖歲時豐去路應逢夏回程
莫待冬詩欣千首富錢笑一文空但覺烟霄迫惟知雨
露濃棠陰城下路歌詠走兒童

幽居

華亭當異位匪北與東南新月織懸夕斜陽暝翳嵐秋

聲連地起雲影半空曇紅葉凋園柿青林秀石楠到門
無吏跡雜坐有農談茗椀惟孤啜橙杯不獨銜芙蓉霜
肅肅楊柳露毵毵晴雪鷗棲渚腥風虎卧岩耕夫朝就
餉過客暮停驂孤篋天疑近清高境不凡谷深寒鎖翠
溪濶暖浮藍養靜閑情愜居安逸興耽康强身懶杖蕭
散髮慵簪暑退嫌藤簟涼生怯葛衫好書常在案雄劍
鎮藏函榮任他人取幽宜我輩探溪山聊寄傲簡牘貴
研覃名教真堪樂禪機弗用叅虛心千箇竹直節數株

杉永夜長庚對煌芒不可緘

挽族兄

布被當年友嗟君更可憐父兄嘉篤志朋輩羨英年早
負穿楊譽終酬折桂緣學成寧落後榜揭果居先未對
劉蕢策旋揮祖逖鞭裾從彤邸曳書向石渠編仕路方
榮進蠻邦遽斥遷瘴生雲滿墨颺起浪掀船地僻夷風
陋天遥氣候偏毒淫那易辟性命竟難全忍死留遺語
含冤入下泉行囊題詠在謫籍姓名蠲弱子攜家返輕

函載骨還九京雖莫作百韻或堪傳勿訝淪殊域猶能
返故阡試觀同譴者亦有葬烏鳶

挽友人

舊說盤中隱今為物外仙識韓空有夢交蘭竟無緣未
論宗支異還叨閥閱聯學精多士許孝篤衆人憐恬退
忘軒冕沉潛嗜簡編衣冠推典則詞賦擅清妍世歷滄
桑改家臻福慶全遺榮身自在占勝地幽偏久悟浮生
幻俄隨大化遷歛裳真逝矣易簣靜蕭然漫詫騎鯨去

那因化鶴還菊軒棋已罷竹館榻仍懸簾捲風翻帙窓
虛雨慢絃遊山雙屐在釣瀨一竿捐雅操超今士高標
慕昔賢新祠應得侑遺稿或堪傳五桂凌霜秀藂蘭浥
露鮮年年寒食節醺酒拜荒阡

壽某翁


聖代功勛著天倫樂事專位躋三品峻義篤一門全致
養惟殫祿通財不計錢永懷烏鳥哺仍感鵲鴒篇萱草
幽藂秀棠花舊蒂連冰盤魚味美綵服鴈行聯祥柰寧

煩守肱衾且用眠老親欣未耄難弟愛彌堅
茵褥重重榻塌簾秩秩筵壽觴更跪勸獵騎並驅還
橘墮猶懷陸荆分謾笑田侯封應有待輿論諒無偏
遐算慈聞健同心貴介賢雄文書盛美燕許筆如椽

題山水圖

別業在圓塘無鄰傍草堂瀾漫新水濶遠近好山蒼
樹密松依檜林幽柘混桑頗同嚴子瀨仍似杜陵莊
橋峻妨遊屐溪迴隱釣航鳥聲春晝永花氣午風涼
把卷潛

心玩逢疑著意詳詎容便水石未可薄軒裳愧我身空
老憐生力致強閑情雖足適壯志會須償尊府當朝貴
佳兒嗣世良奪魁期接武澗壑有輝光



運甓漫稿卷四

欽定四庫全書

集部

運甓漫稿卷五

詳校官編修

臣 翟槐

中書

臣

劉源溥覆勘

總校官庶吉士 臣 何思鈞

校對官中書 臣 李 荃

謄錄舉人 臣 孫 炯

欽定四庫全書

蓮覺漫稿卷五

明 李昌祺 著

七言律詩

遐齡十景

遐齡仙境

西山秀矗碧芙蓉，浩劫天真宅。此中飛瀑倒懸清，灑雪層巒遠聳翠。摩空珠林有樹，皆棲鶴玉澗無泓不蟄龍。

列缺蜚廉皆擁衛綵雲長繞萬株松

玉隆仙府

淨明官觀軼浮埃紫氣丹光接上台
地竇難尋茅落處天空猶想錦飛來
江湖孽去沈淪拯沙井源通障遏開
鍊質仙岩應在此不須東海訪蓬萊

石泉靈瀨

跨鳳仙人杖有靈卓開岩竇見清泠
絕勝猛虎跑來潔不帶潛蛟鎮處腥
春漲暖添三日雨秋澄涼浸一天星

風瓢幾度穿雲汲坐愛潺湲洗耳聽

天寶雲深

洞天原自異人寰可惜梅生分太慳
參杞熟來俱不食神仙過後竟空還
靈呵鬼護金床隱電掣雷轟石室關
蒼狗白雲長靄黷恍疑移下玉京山

紅崖疊翠

曾聞千仞峩嵒頂上有仙翁隱碧雲
蕉葉懶揮塵自遠楓枝不悴景長溫
丹光迸井清宵煥霧氣埋山白晝昏

積黛凝嵐轆轤處藥爐茶臼至今存

緱嶺朝霞

晨瞰乍出上樽桑散作奇文五色章陽谷影高爭煥爛
赤城標建遠微茫曾為燒佛禪師號復作修仙道士糧
若使有緣逢子晉便求嚙嗽上升方

蕭臺積雪

六出花飛尺許深吹笙臺榭盡瓊林長空鶴下巢難認
薄暮樵歸路莫尋玉壘更添仙境勝冰崖不受世塵侵

匏簞冷澁無遺韻贏得琴留折竹音

龍岡雨霽

何年神物此中蟠化作奇峰紫翠攢
水落樹根猶半濕泥沾花片未全乾
天東初日一輪近隴上閑雲萬畝寬
最好連山皆白石霧霏洗出玉鱗寒

鸞岡秋月

銀盤端正掛瑤天灝氣寒光兩鬪妍
白鶴儀鸞成恍惚黃塵清水嘆更遷
五行秀淑茲山聚百種禎祥此地全

應與三仙同不老坐看兔魄謾虧圓

鳳岡夕照

綵翮高飛去不留斜陽長自射岩幽織鳥沈處晴霞斂
巢鵲歸時暮靄收翠鎖雲蘿千嶂暝紅堆霜樹一林秋
人間此是通天竅未必丹丘勝藥丘

送王處士益安之京

亭亭別舸艤江干緩唱離歌勸酒乾老驥尚馳千里足
冥鴻已鍛九霄翰江雲盡日低連水淮雨兼旬悄釀寒

多病子年心獨苦遙瞻魏闕五雲端

蒲帆穩掛一舟輕珍重高年事遠征飛絮遊絲繫別恨
落花芳草黯離情山中暫輟幽人社輦下爭傳處士名
回望南雲鄉邑近秋風江上笑相迎

閒身應暫別林丘垂老觀光帝里遊地控幽并通絕漠
山連恒華拱中州辭家去日逢初夏買棹歸時及早秋
南北兩京饒故舊相過慰藉少淹留

自笑龍鍾雪鬢髭十年因病解朝衫清時引退憐身老

白日冲昇愧骨凡
漠漠平蕪連薊北
依依遠樹隔江南
經行定過淮陽郡
歸計煩君促阿咸

送曾行人還京

專對多才列顯融
十三藩翰有行蹤
官寮盡識荀鳴鶴
郡邑爭看陸士龍
江上曉霜凋杜若
城邊秋水映芙蓉
經行處處饒佳景
總入高情賦詠中

四牡駢駢聳衆觀
梁園邂逅暫相歡
襟懷磊落真佳士
職任清閑最好官
楊柳不禁秋後折
茱萸且向醉中看

懸知歸獻王褒頌三峽詞源在筆端

乍見何堪又別離蕭條況值暮秋時無才報國慚空老
有約歸田嘆已遲風悴井邊梧樹葉雨乾籬下菊花枝
空緘徒有寒溫問不敢煩君寄故知

官亭且暫駐行裝更盡臨分酒一觴同榜故人皆要路
離羣倦客尚他鄉涼風嫋嫋蘋花白夕露淒淒杏葉黃
後夜夷山高處望析津惟覩使星光

留別王教諭士敬

汴省分携又四年他鄉一見倍堪憐
白頭納祿慚予晚絳帳橫經羨子賢
燈影颭風臨水店櫓聲搖月下河船
匆匆會面匆匆別回首長淮一慨然

磊落才華邁後英鄉闈早占甲科名
持衡西陝端無忝分教中都倍有榮
畫鼓升堂黌舍曉青山繞郭縣樓晴
丁寧勿嘆淹閑散早晚吳公薦賈生

黃河幾曲繞荆山楊柳陰中帶暝灣
老子得歸全出處故人相見雜悲歡
從教健翮縱橫上且喜閑身自在還

莫負明時勤造士坐聽絃誦到更闌

寄石潭劉先生并李鍊師

偶因衰病返丘園白首依然混俗氛
寧復嬉遊來勝境徒令夢寐想清芬
秋山秀色終年對天路空歌每夜聞
宴坐萬松蒼雪裏不知塵世有囂喧

久不班荆話夙心遠勞封茗寄雲林
殷勤諫議情偏厚憔悴文園渴正深
十載鄉音憐斷絕幾人交誼篤升沈
看雲倍切懷君意離恨悠悠可自禁

相卿朋舊總英賢久乏鱗鴻寄尺箋令子俱為天上客
阿翁都作酒中仙堅持苦節共先訓順受微疴了宿緣
社櫟任他松柏笑支離却得保餘年

挽某孺人

婉婉雍和著令儀如賓相敬世應稀遺衣尚有親縫線
殘綜猶餘手斷機零落堂萱霜已悴蕭條園薤露初晞
兒孫拜掃蕭坊塚梧楨西風葉亂飛

題蕭于京卷

吾邦自昔產才英畫手如君藝更精柱國少師題舊隱
經筵學士表新塋優閑有興詩兼酒落魄無心利與名
猶記京華曾識面白頭回首故人情

寄龔廉使并虛谷僉憲

秋鴻春燕各西東回首天涯一病翁
晚歲懸車應愧我明時攬轡最推公
才名未許張綱擅清德惟期趙抃同
從此雪山知更重羣賢風裁兩爭雄

雨中發洪都

豫章城下水如苔風雨官河一棹開山色遙連蕭寺暝
雁聲遙度楚雲哀霜凋遠樹寒燈見鳥背孤帆極浦回
畫棟朱簾遺閣廢荒基歲歲長蒿萊

訪鷺洲書院遺址

宋家書院但空名二水中分草樹平陵谷變來基亦廢
野人耕處草還生落花細雨文魚上殘柳西風白鴈鳴
臨眺不堪懷往事城頭畫角更淒清

舟次安慶

層層雉堞石崔嵬小市參差野岸隈賈客帆檣沙際落
人家樓閣水邊開英雄埋沒成塵土墳塚荒涼翳草萊
莫上高城重弔古東風斜日使人哀

春坊黃學士索賦劉縉草堂二首

靜者茅堂近翠微華門松徑往還稀水生南垞鴈初下
月出西巖人未歸迸筍亂穿苔蘚破殘花故傍薜蘿飛
清泉繞屋雲林密縱有溜塵得染衣

石角藤枝似灤西懸蘿引蔓覆簷低雲來高樹虛窗暗

春去深林好鳥啼蛛網靜粘飛絮雪燕巢新補落花泥
碧山學士能相過咫尺滄浪是浣溪

喜陳七表弟至

客舍蕭條忘却官愁顏暫解強為歡相逢尚憶兒時事
乍見渾疑夢裏看故國有田供歲計他鄉無絮耐冬寒
明朝又作天涯別且對青燈共夜闌

秋夜聞砧

萬遍千回擣未休疎星涼月夜悠悠酒醒空館聞偏苦

老厭他鄉聽更愁
綃帳銀屏霜氣早
黃雲白草塞垣秋
妾心已逐寒聲碎
憑仗風吹到海頭

送孫吉士省親還浙

勞勞亭畔送將歸
莫惜離尊醉落暉
霜葉暝隨淮水下
風帆晴向練湖飛
還家只喜庭闈健
到處仍憐故舊稀
綵服寧親兼畫繡
人生得意似君希

賦落花

愁紅怨粉各依依
樹下偏多樹上稀
總為春光爭艷冶

金史卷之八十五
卷五
却教夜雨妬芳菲數枝浸水魚吹去幾片紫林蝶趁飛
莫怪東風成薄倖猶能收拾點人衣

送同年曾侍講扈從北行二首

長樂疎鐘曙色催千官扈蹕出蓬萊香飄輦路鸞輿至
日射天袍堆扇開九域車書同盛典兩京詞賦屬雄才
從容得侍清閑宴更捧南山萬壽杯

天子宸遊幸北京從官誰是最知名青鸞紫鳳隨行在
玉碗金盤出內庭芳草細承宮珮軟飛花故落御衣輕

賡歌何限鄒枚匹獨說相如賦有聲

寄彭修撰李吉士二同年

千里迢迢隔兩都雁歸不寄半行書只緣久別交情薄
自是長貧行輩踈細雨落花朝退後游絲飛絮燕來初
故人寂寞芸窗裏遲爾封緘慰索居

書館即景二首

十里金河繞內城城邊闌檻逼人清池萍過雨馴鷗下
苑樹呈陰好鳥鳴入座水風翻帙亂隔窓簷日漾波明

萬年枝拂官牆翠時見雙飛粉蝶輕

溝水斜通官苑近回廊遙接禁垣長千層雉堞圍黃屋
百轉鶯聲在綠楊曉霧暖浮空翠色春流晴泛落紅香
無端景物皆佳興更愛鍾山樹鬱蒼

車駕南還江東驛拜迎有作

鳴笳疊鼓震淮山共喜時巡大駕還畫戟雕戈羅萬騎
紫駝白象列諸蕃謹聲遠度旌旂外香霧長浮罕畢間
雜還都人多似蟻一時拜舞望龍顏

送鮑琮之吉安教授

送別因君憶舊鄉，郡城南面好徜徉。
青山秀落屏風裏，粉堞高環學舍傍。
佳句欲成仍對酒，春衣初試更焚香。
老親林下知相見，華髮應添別後霜。

元日早朝

熹微曙色半氤氲，閭闔初開鹵簿陳。
雲表露凝仙掌重，仗前風細珮聲勻。
雪消鵲鵲千門曉，花映鴛鴦合殿春。
久侍朝班無寸補，年年此日沐恩新。

病中酬周吉士忱見贈二首

自嗟淺薄負明時更嘆長貧少故知書卷病來荒舊學
柴門客去重深思花容有態隨春老藥力無功得效遲
擬學無生消世念惟應禪寂共襟期

為客何堪倍憶家還悲伏枕度年華病魔不逐青春去
醒眼惟愁白日斜已覺尪羸踈酒盞更憐憔悴負鶯花
方書藥性偏多忌猶說逢人擬斷茶

送劉生還鄉

不辭千里問庭闈綵服如何又遠遠新鴈近隨秋共至
故園遙喜客初歸空林向晚鴉爭集衰柳驚風葉亂飛
應愧殊方飄泊久看雲送別總沾衣

春日南宮對雪

退食南宮看雪飛塵埃頓覺一時稀千門曉色連青瑣
雙闕寒光照粉闌倦逐梨雲飄舞袖閑隨柳絮上朝衣
高才莫續梁園賦却憶盤洲獨釣歸

孝陵春日陪祀二首

鶴駕乘春謁寢園日華浮動

原闕

黃鶴翩翩不可招
玉棺夜墮葬王喬
已知妙行書仙籍
又見褒封下聖朝
俗眼謾揮蒿里淚
清風閑却竹宮簫
真人道業憑誰傳
虎觀鑾坡盡久要

送人之淮安稅使

花雨消塵草色新
金川門外是通津
江雲片片低連水
檣燕飛飛近掠人
畫燭牙籌官舍夕
綠蒲翠柳郡城春
懸知公退多幽賞
淮水淮山賦詠頻

南郊分獻禮成有作

鳳蓋鸞旂下九關
豐隆列缺護郊壇
星臨行殿鐘初動
月射齋宮夜未闌
佳氣直浮雙闕外
祠光遙在萬松間
相如未覺才踈薄
誰道明朝獻頌難

寄劉貢士孟恂二首

河橋雨過柳條新
野岸冰消草色勻
幾處秦樓春自好
一瓢顏巷客長貧
流年不用悲明鏡
高誼惟應愧故人
翹首石潭潭上路
東風那得有車塵

竹屋無人靜掩扉
病身坐愛暖風微
悠揚甕底醞鷄舞

撩亂窓間野馬飛家在江南田地少年來海內友朋稀
登山臨水情何極惆悵高懷與願違

寄同年曾學士子榮

青春載酒立鰲峯兩扈宸遊看會同日暖雲旂翻白獐
月寒天闕倚蒼龍閑庭幽草芊綿綠別苑飛花淡蕩紅
侍從詞臣多似雨長卿作賦獨能工

早朝

金河秋早水生涼清漏沈沈夜未央闕對鍾山通御氣

露搏仙掌溢寒光
天垂複道星辰近
月隱重城睥睨長
粉署由來多俊彥
獨慚題柱漢仙郎

孝陵秋日陪祀東彭贊禮永年

鍾山欲曉色蒼蒼
小輦輕輿出建章
苑鹿不驚仙仗過
潭龍故噴御泉香
重城隱霧留殘月
高樹含風送早涼
惟有祠官最清貴
時來導駕沐恩光

悼貴人

百戰功成初拜侯
貂蟬雉尾換兜鍪
登丹青擬上麒麟閣

紅粉空餘燕子樓，郾塢有金僧施得平津無客妓來遊。
若教富貴兼難老，江水應須北向流。

太廟臘享同吏部王郎中吏部丁員外刑部蕭
員外陪祀有作

寶砌瑤堦積雪稀，齊開金鎖敞朱扉。五雲光裏來華蓋，
萬樂聲中拜袞衣。鳳輦乍移清廟闔，龍旂輕拂上林飛。
禮成冠珮參差出，佳氣祥煙繞禁闈。

秋日獨遊黃鹿山望嶺策寺二首

梵宮遙對鳳凰臺此日乘閑偶獨來
古墓石麟空蔓草空祠土像翳塵埃
溪光淡淡秋鴻下野色蒼蒼夕鳥回
不用咸陽原上望西風臨眺亦堪哀

青龍山下人煙少黃鹿庵前日影斜
隔塢寒松遙見寺平田晚稻正垂花
芰荷蕭瑟鳬鷗水莎草棲迷雁鶩沙
弔古自應增感慨非關久客在天涯

挽張揖川處士二首

寂寞秋山落日邊草堂人去鎖寒煙
移家北里無華館

供祭南山有薄田零落幽蘭餘澗底蕭條寒菊對門前
天涯莫致生芻莫灑淚西風一慨然

華屋山丘事已非先朝遺老近來稀徒令過客題新塚
猶有行人歎舊扉衰柳謾餘陶令宅荒苔空沒子陵磯
故園朋好凋零盡暮雨寒雲弔鶴飛

挽集方陳處士

寂寂空林長薜蘿集芳園裏落花多幽堂有石銘先泐
舊宅無人客獨過海內生芻慚古道淮南藂桂想遺歌

山陽回首悲鄰笛欲賦招魂奈爾何

九日獨登雨花臺追用杜牧韻

客裏登高思欲飛乾坤但覺此生微
關河迢遞親垂老松菊荒涼人未歸
六代空臺餘古塔幾家新塚對斜暉
寒煙蔓草西風外惟有秋荷好製衣

題求志山房卷

久忘軒蓋身將老高卧雲林事總拋
酒熟只知留客醉家貧惟喜借書抄
雲迷高樹猿窺果葉墜空林鶴緝巢

試問白駒空谷裏幾人黃髮在衡茅

送劉僉事還浙兼寄陳御史

都門秋樹葉紛紛惆悵西風袂忍分頭戴鐵冠辭魏闕
手持玉斧過吳門孤村遠磬敲殘月極浦歸帆沒斷雲
為報霜臺驄馬使南宮倦客久離羣

送陽生之北京聽選

白下相逢政早秋異鄉還喜暫淹留關河遠道同為客
風雪殘年獨宦遊冒雨歸鴻投極浦經霜落葉在扁舟

尊前謾遣離情散醉後翻成別淚流

送錢秀才歸文江

勞歌一曲黯離憂酒盡人分不可留
獨樹斜陽回夕鳥孤舟殘雪泝寒流
行臨湍水瀟瀟險家在圓塘別業幽
欲折疏麻採衡杜秋風零落滿滄洲

送李生赴會試

明時自笑離羣久中歲仍傷送別頻
暮雪梅花殘臘酒東風楊柳上京人
仲容年少青雲早杜牧才衰白髮新

西抹東塗成昨夢天涯空憶杏園春

謫官後崇上人房話禪

下方無計避浮名且向空門話道情
久廢琴書緣性懶乍拋章綬覺身輕
山僧臘共雙松古野客心同片月清
亦欲斷緣依法住經函茗椀了餘生

東溪釣隱

東溪不減浣溪名竹逕柴門事事清
只與漁樵長混迹自緣軒冕久忘情
夕陽曝翅鷗鷁飽秋水浮灘舴艋輕

肯使身名入城府滄浪日日濯塵纓

送太學王生省親

送客行歌出鳳臺離情鄉思醉難裁故園舊友三年別
晏歲長淮一棹回鷺渚別來頻入夢鷗江歸去且銜杯
囊空無物堪持贈聊折寒香雪後梅

東華春望次周編修韻

濛濛香霧散輕寒翠瓦光凝漸欲乾乍暖鶯聲偏好聽
初晴樹色最宜看鍾山雲近浮雙闕金水波明照百官

猶記粉闌通籍日文華幾度候鳴鑾

西掖書懷次周編修韻

清禁遙當輦路開長廊斜抱御溝回鐘聲欲動龍樓啓
扇影初移鶴駕來十載中朝多制作一時東觀盛人才
掖垣梧竹凌霄漢盡是高皇舊日栽

左掖聞鶯次前人韻

萬年枝上雨新晴朝退初聞禁苑鶯隔葉好音偏入聽
傍花嬌語更多情悠揚巧入龜年笛縹緲清諧子晉笙

惟有詞臣最閑暇輕搖玉珮讓和鳴

寄胡學士光太二首

薊門五月似新秋易水金臺王氣浮行在星辰環帝座
故人霄漢扈宸遊林桑葉盡春蠶老庭樹條空夏果收
良會未期成濶別幾回飛夢到瀛洲

遠別悠悠各一方思君空有九回腸掖垣梧竹秋生草
官舍琴尊暑退涼白髮庭闈頻積念青雲故舊未相忘
灤京今夜雲霄月肯把清光照草堂

寄同安張忍庵通守

東風催雨過淮淝萬戶千門曙色微
漸老只愁朋舊少逢春不放酒杯稀
長江繞郡商帆集遠火沿山獵騎歸
惟有忍庵意外雪比君高操更清輝

感舊游二首

深戶長廊對面開東風楊柳舊章臺
芳心暗托秋波訴幽夢空成暮雨來
燕婉鶯嬌徒有態花飛蝶駭只堪哀
風流想像高唐賦千載人憐宋玉才

長干東畔是秦淮葉自隨流信自垂花底玉纖崔護水
月中珠淚郭華鞋晚峰尚學青螺黛冰筋猶疑白燕釵
四海遨遊空有意忍彈歸鳳獨傷懷

送倪主事還北京二首

江亭夕鳥背人飛愁對芳尊話遠違霜後長林餘敗葉
道旁荒店掩空扉薊門草色青連野灤水春香綠染衣
我有離心何處寫寒雲遠樹共依依

秦淮晏歲見孤鴻足馬蕭蕭趁朔風淺薄豈堪當路薦

光華難與故人同
微茫遠見盧溝樹
縹緲遙聞魏闕鐘
無補涓埃貧病久
偏承雨露羨羣公

春日憶諸弟

不為長貧謾自悲
年來鏡裏覺顏衰
殊方失路逢今日
故國投簪定幾時
池草謾成清夜夢
庭花空見紫荊枝
凌雲壯氣消磨盡
只有丹心似露葵

送龍生歲貢之北京

淡雲疎雨弄微和
北去金臺路幾多
地控中州連朔漠

天回北極拱星河陶山過雨青浮黛沂水驚風白湧波
年少未應憐遠別臨分不用唱離歌

送太常高贊禮考滿赴京

慣聽雲門大夏音兩京聲譽重南金天開行在關河壯
山隱長林樹木深遠戍數星寒夜火孤村一片夕陽砧
自慚無計陪簪紱千里空懸戀闕心

送劉生赴會試兼寄曾學士子啓

朝來朔鴈帶離聲臘盡洸河走濁冰飛舞雲山環近甸

微茫煙樹見長陵
新傳虎榜題劉晏
舊說龍門愧李膺
惟有相如才調美
每將詞賦擅聲稱

送艾秀才還文江三首

楊柳陰陰虎踞關
離亭把酒送君還
到來建鄴春將盡
歸去文陽夏已殘
客裏有書惟寄雁
山中無樹可棲鸞
分携已自傷懷抱
回首他鄉別更難

踈踈蘆葦野鷗飛
遠水茫茫一棹歸
雨過山田收早稻
涼生客舍感秋衣
江村露冷蛩聲急
楚澤天清鴈影微

白髮難兄如見問為言空憶故山薇

白門涼露滴官槐一葉扁舟候曉開
家住秋山松桂老門臨春水鷺鷥來
夕陽蕭寺踈鐘斷晚月滄江旅棹回
到日高堂調膳罷平安先寄鳳凰臺

送周編修考滿赴北二首

勞歌一曲黯離情鄉夢中霄戀去程
北闕故交成久別南宮倦客已除名
山城奏角人初寢野岸維舟月乍生
良會幾時如可卜早憑歸鴈寄新聲

垂楊夾道晝陰長
五兩南風送去航
政羨諸公當要路
獨憐十口在他鄉
風生平野春苗綠
雨歇高林夏果黃
行在倘逢知己問
別來潘鬢易滄浪

送胡御史遷評事考滿赴北

雪中歸鴈帶離聲
且共清尊慰別情
周室羣僚尊柱史
漢家多士重廷評
洸河凍解流漸下
薊野春回細草生
此去定應司獻納
丹心長向北辰傾

大祀雪霽之作次周編修韻二首

羽林千騎擁旌旄六出飛花點繡袍
玄武旂翻香霧暖蒼龍闕倚卿雲高
蓬萊御氣浮春樹泰時祠光絢露桃
天陞兩曾分裸獻獨慚無頌擬王褒

月冷瑤堦燭影微爐煙遙傍侍臣衣
鍾山政對齋宮近瑞雪先迎御輦飛
環珮聲來天步近衣冠身到泰壇稀
何人屢得陪宣室賈誼承恩在禁闈

元夕觀燈次前人韻

解凍風輕暖尚微天街夜色散清輝
香飄綺席回歌袖

燭射珠簾晃妓衣
星斗漸隨華月落
笙歌緩送醉人歸
仙郎自笑才情減
謾憶傳柑出粉闥

陳處士挽詩

一枕翛然靜解神
鶯花零落草堂春
山中結社無遺老
地下埋銘有故人
不向塵埃留半跡
獨從丘壑寄閒身
蠅蛸在戶懸空榻
徐孺重來淚滿襟

送人還安城

客裏那堪送客歸
臨分相對各依依
離亭酒盡人皆醉

故國書遥雁亦稀斜日驛樓秋樹暗孤村僧舍暝鐘微
武功秀色青如染只好閒看靜掩扉

送人還文江二首

客中寥落畏秋來況是逢秋送客回家在鄉園惟夢到
身兼貧病復年催衣沾殘雨衝寒去鳥背孤帆帶暝開
良會幾時仍話別臨歧分手重徘徊

帝城相見總相憐忘却飄蓬謫宦邊官舍蕭條秋雨裏
鄉音歷落夜燈前數株衰柳門常掩幾杵殘鐘客未眠

惟有多情天上月清光遲爾到家圓

送蕭知縣復任臨淮

石城臘盡覺寒微
百里重臨願不違
潮落斷冰隨水去
林疎敗葉著霜飛
長江白浪帆來遠
細雨黃蘆雁下稀
相見未幾還又別
離情鄉思兩依依

復職再至南宮舊署

三年沉落別南宮
舊事新來總不同
清世未容辭組綬
病身寧想到方蓬
趨朝又註金門籍
待漏初聞紫禁鐘

自幸為郎叨載筆却憐執戟漢揚雄

舍弟客錢塘索家書寫此示之

故園書信久荒涼愁對西風見雁行
身在京華依魏闕夢隨潮信到錢塘
乍添老態經憂患漸入中年易感傷
閒看白雲惆悵久不知清淚已沾裳

郭處士挽詩

嗟君久隱白雲間地下修文竟不還
謾有琴書閑別墅獨留墳墓在荒山
春風自種陶莊柳暮雨誰紉楚苑蘭

忍向江鄉詢故舊百年遺老半凋殘

喜錢進士習禮除翰林檢討賦此寄之

清才玉署正相宜錦字華臧慰所思
霄漢幾回勞夢想酒杯何許共襟期
小憲殘燭懷人夜斜月疎鐘聽漏時
知在詞垣吟更好便鴻莫遣寄來遲

寄曾學士子榮

白門離別已三秋閒對停雲憶唱酬
心共星辰常北拱夢隨江水亦東流
千門曉色春初動萬瓦寒光雪未收

獨有龍頭金榜客解將詞賦扈宸遊

寄刑部李主事時勉周主事恂如

二妙翩翩最好辭拜官同在白雲司一身多難憑誰問
三載離羣獨爾思紫陌香塵聯轡處絳紗銀燭候朝時
才名獨數枚臯盛肯把新題寄所知

冬日與彭贊禮永年登治亭

吳人治處有遺亭與客尋幽暫一登東下江流通海白
南來山色入淮青疎鐘晚送歸巢鶴落葉寒敲近樹扃

最愛孤高闌檻好幾時更共故人憑

再用前韻東前人二首

東南形勝壯茲亭閒共孤雲野鶴登淮水寒光天混碧
鍾山秀色樹浮青空林槭槭人初去落葉蕭蕭戶半扃
六代衣冠埋草莽由來富貴信難憑

金陵無數好臺亭臨眺偏宜此處登江滙海門諸水黑
天連秋浦九華青雲旂畫下瑤壇靜石髓春香玉洞局
鳳想鸞情霄漢表不妨暫借赤欄憑

孫處士挽詩

彈冠不遣世相知
明月清風每自怡
山水半生資雅趣
江湖幾度滯歸期
白雲長伴蘇門嘯
宿草空餘薤露悲
何限丘園棲遯者
誰人身後有銘碑

段處士挽詩

不將名姓達時賢
長在蘭陵野水邊
數畝薄田手自種
幾聯佳句客爭傳
清談久廢圍棋局
問字空回載酒船
惟有孤墳鄰季子
東風無處薦芳荃

宋處士挽詩

漫浪江湖酒與詩玉簫明月好襟期
老逢昭代承平日生在元朝喪亂時
健翮不隨黃鵠舉閑心惟有白鷗知
全歸地下如公少迢遞南州重我思

送人之北京

水綠蘋香鳥亂啼汀洲芳草更萋萋
人分殘雨雪亭外鴉背斜陽極浦西
江柳受風偏舞困林花經社競開齊
天涯春色傷離思莫惜臨分醉似泥

柳

含煙裊霧自青青愛近官橋與驛亭春滿章臺偏婀娜
秋深隋岸最凋零長從蘇小門前折幾向龜年笛裏聽
絕勝東風桃李樹飛花猶解化浮萍

送陳郎中重使西域次曾學士子榮韻六首

纔持玉節出咸京策馬仍為絕塞行北闕風雲冲劍氣
西河將校仰威名懸崖古塞千尋險衰草荒原一望平
多少羌戎爭出迓使星昨夜到邊城

歸朝重看拜司封又出陽關第幾重路入伊吾沙關

齋磬山鳥銜花落石床澗底風回喧地籟岩前日出散
天光俗塵不染祇園士坐學無生與世忘

駕幸朝天宮祭星之作

上帝蕭臺衛百靈儲皇拂曙醮羣星清都秘籙開雲篆
白晝神雷擲火鈴曉露未乾珠樹濕天風微動寶花零
叨恩久在南宮裏長從鑾輿幸治亭

四月十八日鶴駕再幸鍾山余與大理寺丞鄒
公師顏戶部郎中林公和楊公端員外郎張公

賓陽石公堅聯騎從小徑行憩松陰候駕有作
萬畝松陰一徑開象王此地有樓臺春殘好樹驚花盡
風度和鑒識駕來香篆半銷僧定久鐘聲欲斷鶴飛回
空門景物多清賞未解朝衣愧不才

送彭贊禮之北京

五月驅車過薊門黃金臺下駐行轅千林果熟新經雨
雙闕踈鐘遠度雲星斗芒寒環北極山川形勢壯中原
情深不忍輕分別更上高樓一望君

送人還南康

梧桐葉落火西流，楚客驚時問故丘。
百畝腴田環舊宅，幾人白髮在滄洲。
二賢祠下蟬聲晚，五老峰前鴈影秋。
見說匡廬多勝處，何因來共赤松遊。

送于生還鄉

紅槿花稀夜合殘，行人千里問鄉關。
客情偏在初秋裏，旅夢頻生半醉間。
細雨帆檣投極浦，孤村燈火隔前山。
西風無限滄洲意，欲採芙蓉愧未閑。

送上舍之北京

官槐涼露曉來收之子含情解去舟
閣道千門開北闕關河萬里壯中州
月低高樹重城曉風漾微波太液秋
此去彈冠問知己故人天上扈宸遊

送熊生還鄉

石頭城下柳蕭疎久客懷歸念遠途
鄉夢每生鐘斷後客愁政在酒醒初
扁舟暮雨青衫薄折葦涼風白鳥孤
擬共丘園尋別業臨歧相送獨踟蹰

原闕

鴈憶鄉書

西風嫋嫋蘋花老欲續離騷賦卜居

酬曾學士子榮見贈復職之作

放逐仍居患難中三年執役梵王宮
病來短髮逢秋白老去衰顏惜酒紅
心似葵花傾曉日身同樹葉感霜風
杜陵花竹頻生夢但覺陽春處處融

讀元進士李祁雲陽集

神情秋水態春雲
菽粟甘腴布帛溫
菊徑秋風陶栗里
柴門落日杜羌村
鸞歌鳳吹排空遠
蚓竅蠅聲到處喧
縱有黃金那可鑄
寥寥騷雅向誰論

張舒州家觀元承旨危素畫像

虞揭凋零玉署空
堂堂至正獨推公
氣全河岳英靈秀
手抉雲霞制作工
江總歸陳翻恨老
賈生鳴漢早稱雄
丹青似有無窮意
却寫南冠入畫中

擬唐宮人入道

笑著黃冠脫翠鈿
改粧風韻更天然
元君便授中堦錄
阿母新留大洞篇
雲雨已無當日夢
煙霞或有夙生緣
清齋夜禮羣星罷
學鍊丹砂繡閣前

詠燈花

羞向明開向暗開
芳釵暖燄照銀臺
須臾爛漫都成蕊
頃刻凋零半是煤
綉幌不愁疎雨至
紗窓只怕猛風來
歌闌舞罷人歸寢
一寸丹心未肯灰

懷劉貢士孟恂

學館相逢意有餘青燈綠酒夜窓虛眼看世事宜高枕
身在他鄉念遠書落日暝歸投樹鳥清潭時見避鉤魚
秋山若有蘇樵地擬結茅堂傍隱居

春日遊池州梁昭明太子廟

池陽山水郭西雄華構蕭條一半空野蘚春沿香案綠
岩花晴照袞衣紅千年此地留遺跡六代何人有故宮
玄圃已荒文選在令人終古仰高風

登齊山翠微亭

傷春惜別總關心愁對鶯花思不禁外地逢人偏感慨
他鄉弔古強登臨天連秋浦帆檣遠日射晴波島嶼深
猶有翠微遺趾在樊川佳句重南金

遊揚州繁禧觀

廣陵城下暫維舟謾向繁禧觀裏遊春日長林啼好鳥
暖煙芳草載驂騑柳空隋樹堤仍在花落雷塘水自流
弔古不煩頻感慨瓊花芍藥總荒丘

濟寧州學觀漢碑

崔嵬堆堞啓重闢學舍荒涼禮殿開孔壁已傾塵半掩
漢碑猶在字將殘庭槐入夏當窻綠野蘚經春上砌斑
鐫泐至今餘古意摩挲竟日不知還

送林推官復任吉安二首

薊門秋早雨潺潺
芣服涼生暑氣闌
眼底貧交如我老
郡中廉吏似君難
偶因論舊懷幽處
何敢投閑戀故山
遙想軒車重下日
芙蓉開遍菊開殘

黃金臺下見歸鴻
送別因君思不窮
白髮庭闈千里隔

青雲冠蓋幾時同
政憐出牧難為守
猶喜平反獨得公
鄉郡近來非夙昔
豈無凋弊待春風

召赴北京留別靈谷定岩戒上人

長憶煙霞水石邊
高僧於我最忘年
梅檀樹底焚香坐
優鉢花間掃榻眠
了幻未能辭五濁
觀空自可斷諸緣
無衣無帶堪留別
林下分攜一慨然

送周知縣復任句容

月淡霜清禁漏殘
朝回初退紫宸班
來飛葉令雲中鳥

歸看茅盈隱處山城邊棠樹應多種壁上蒲鞭只是閒
列宿垂輝皆拱北郎星獨近太微間

送王叅政之江西

東南形勝大藩雄襟帶江湖百粵通紫氣虹光牛斗上
落霞秋水畫圖中幾年凋弊憐諸郡今日旬宣賴數公
送別因之重懷土浦雲山雨思無窮

讀元楊仲弘詩

才名卓犖四賢同進士詩人兩萃公周鼎殷彝推范古

天機雲錦讓虞工
江湖汗漫遺編在
風雅蕭條大筆空
玉樹瓊枝那可見
閒花野草自青紅

送毛生還鄉

積雨初乾露欲霜
儒衣秋半不禁涼
離離墜蔓敦瓜秀
纂纂垂林小棗香
薇省久拋邦伯印
柴門最憶野人莊
盤洲水與環洲接
投老歸來掉釣航

清明日憶先妻

客裏淒涼感慨頻
禁煙時節更酸辛
鶯花謾濺中年淚

燕麥空搖異縣春
德耀獨憐成薄命
黠婁誰與共長貧
難將杯酒澆荒塚
腸斷東風倍愴神

庚子元日

旭日熹微散曙光
忽逢元日倍沾裳
久隨塵土房山卒
曾廁煙霄粉署郎
蒲柳豈知渾易老
蘇猶憶最先嘗
惟餘一寸丹心在
絕似葵花只向陽

慶成侍燕

時署禮部事

輕霞殘雪絢朝晴
又慶南郊大禮成
鶴禁弘開排列仗

鸞笙低奏度新聲金花只覺簪來重寶篆頻看裊處輕
立近紅雲清切地叨恩更比去年榮

二月二十六日欽頒天花祥雲瑞光圖至自北
京并秦中所獻玄兔余忝署禮部事陪百官致
辭稱賀退而有作

柳暗花明禁禦春寶圖頒瑞示廷臣雲霞燃煜天光近
河漢昭回御墨新秦甸已看來異兔周郊又見出祥麟
太平嘉應多如雨獻頌何人筆有神

送羅司訓考滿便道回家

嬌鶯百轉柳三眠忍向青春別客羶芳樹暖風來燕候
柔桑麗日浴蠶天路經山驛逢人少家住鐔津喜地偏
若向他鄉持教鐸封書好倩鯉魚傳

遊龍濟寺

暫息塵蹤泯世緣且留金地禮金仙三生石濕垂蘿雨
百衲衣薰煇茗煙猛虎跑泉松戶外馴猿投果石龕前
春深絕頂人稀到花落閑窓僧自禪

熊翁挽詩

看山釣水遠辭氛，榮辱升沈寂不聞。
濁酒一瓢留客醉，芳花幾樹許人分。
竹林羣從多能賦，芹泮諸儒每過門。
膝下有兒今白髮，猶將老淚灑孤墳。

次儀真入廣陵

細草新蒲綠滿洲，人家多住水邊頭。
淮雲過雨晴猶濕，江霧凝寒曉未收。
老樹數枝依野廟，飛花幾片在漁舟。
誰知客子思親苦，謾道青霄萬里游。

徐州

膾膾平原四望通
周遭官樹覆崇墉
浮橋小市東西岸
亂石奔流上下洪
白鳥微茫疎雨外
青山明滅斷雲中
黃樓制作皆名筆
惟有灤城賦最工

德州

江上南風起浪花
江頭新柳集鳴鴉
長懸雙轂牛車穩
流水孤城雉堞斜
沙燕穴巢穿斷岸
汀鷗伺食立枯槎
平原更比青原好
何事行人只憶家

四月二十七日拜廣西之除賦此志喜

紫殿沈沈禁漏稀金鋪齊啓掖垣扉已知側席求賢俊
詎料掄才到賤微選榜乍題香墨濕朝官初退軟塵飛
南藩此去中州遠敢憚驅馳駟牡駢

泊祁陽縣

峭壁懸崖百轉灘奔流砥石響潺湲驛征遙指天邊樹
詩境頻看雨後山香稻垂花當夏熟芰荷折柄近秋殘
自憐不及澄潭水靜照孤雲野鶴還

石期驛獨宿懷鄉

萬里驅馳負簡書，桂花開遍雨晴初。
窓敲落葉空庭靜，門掩殘燈古驛虛。
露冷踈林驚宿鳥，江清遠火見歸漁。
天涯回首懷親舍，歌枕無言意有餘。

桂藩城樓

桂林繞郡皆奇觀，勝槩登臨此更多。
五筦雲山連越舊，百蠻溪水匯牂牁。
藩垣愧乏涓埃補，歲月真成漫浪過。
只把新詩當遺愛，他年留與野人歌。

峽山寺

峽山奇處飛來寺門俯澄江落木邊猿解賦詩悲往事
松能托夢保餘年曇花貝葉高僧榻瘴雨蠻煙過客船
安得此身無繫累蒲團共坐閱空詮

庾嶺

筍輿度盡嶺西東不見梅花只見松華扁空堂丞相廟
寒泉枯木梵王宮雲連瘴影峰峰別水帶春聲澗澗同
無賴山桃并野杏芳菲到處競新紅

重過全州湘山寺

野殿荒涼戶半開昔人題字已侵苔
却憐蘭若成塵土那得閻浮免劫灰
蛻骨龕中僧久寂留衣海上客重來
忘情不為耽禪悅貪看青山日落回

送人之廣西

雕甍畫省畫沈沈我昔旬宣此暫臨
五嶺地連諸郡遠兩江路入百蠻深
薇花舊種應爭秀棠樹新栽未布陰
父老不嫌無惠愛逢人猶寄別來音

寄同寅周布政

名藩共說廣西東，比却中州勢更雄。
署列三司尊省憲，疆連五筦壯提封。
承流宣化空慚我，易俗移風政賴公。
無限相思山水隔，幾時冠蓋可相從。

解空寺

驚嶺駝峰似削成，下方雷雨上方晴。
傍岩高樹巢溪鶴，隔塢疎鐘震海鯨。
花氣濃薰僧袖潤，茶香遙沁客懷清。
幽尋未有重來日，且挹風泉聽梵聲。

贈商人

浩蕩江湖往復回春光秋月任徘徊
翠眉歛笑歌金縷紅袖籠香捧玉杯
贏得閑身渾未老莫教歸思苦相催
人生行樂知能幾莫把芳心變冷灰

寄致政彭太常永年三首

長避時人友鶴羣秦淮明月蔣山雲
欣逢有道辭簪紱贏得無家念子孫
湖海詩名今已著煙霞癖性老仍存
忘年不是朋游少知己惟應獨有君

久住天丘號羽人萬株松柏一吟身秋林掃葉安茶竈
雨逕留苔當坐茵仙境道心同寂靜詩情字體兩清新
相從擬學還丹訣尚恐緣應隔兩塵

未解天弢解世緣心情長寄海鷗邊松風石瀨輸孤聽
梅月山窻憶共眠未信留侯真辟穀也知郭子託遊仙
憑誰為起青牛老共究希夷象帝先

愛梅軒

兩株低亞小窻邊冷淡娉容夜更妍露挹清香來枕上

月分疎影到簾前
郎官東閣應無夢
處士西湖最有緣
偏是年年冰雪裏
孤根長自得春先

寄高道士

髭鬚長黑髻長青
椿比年齡鶴比形
藝盡名香朝碧落
坐穿孤榻鍊黃寧
松高却礙秋看月
草軟偏宜夜禮星
難挹風標徒悵望
海天空濶鴈冥冥

庚戌花朝

愛閑長日掩衡門
懶步芳堦惜蘚痕
百歲光陰將大半

一年春色又平分梨花開到簷前
蒔蒲草青回石上根
永樂初科逢此日三場正試禮闈文

晚春郊外七首

春雲春霧朝朝雨煙壘煙禽處處泥
隨水落花千片去
隔林好鳥一雙啼
筍穿苔蘚青痕破
草混薰蕕翠色齊
安得更如年少日尋芳買酒郡城西

柳外輕風拂面來
春忙半是杜鵑催
多般野菜參差老
幾樣林花接續開
竹為近堦難迸筍
松因臨水易生苔

追思往日嬉游伴聚散如雲倍可哀

九十光陰大半空減衣時候又相逢柳濃偏妬羅裙綠
花淡還欺茜袖紅酒興已隨詩興減老懷爭及壯懷雄
誰能不動傷春感況在千愁百病中

棟花將綻芳花稀蒲筍初生竹筍肥山鳥喚晴相對語
園蜂趁暖作羣飛羞將艷蕊簪烏帽笑指垂楊妬綠衣
兩兩牧童殘照裏齊吹短笛跨牛歸

青鞋布襪踏斜陽枳殼山樊撲鼻香宿草驚鷗相對白

採花蜂蝶欲爭黃
圓浮水面荷錢小
細裊波心荇帶長
猶記秦淮西畔路
秋千競出柳陰牆

雨外林鳩不住啼
落紅狼籍半沾泥
秧苗帶穀根猶淺
麥榦垂花穗已齊
鷗下只投荷葉嶼
蝶飛多傍菜花畦
青水綠山饒詩景
歸路扶筇醉懶題

筆硯圖書且暫停
尋芳聊傍水邊行
禁煙巷陌偏傷雨
修禊天時不厭晴
堤柳折來憐色嫩
野棠開處愛香清
南朝舊日歌鐘地
煙草萋迷晚照明

雲溪清趣卷

層層片片舒還卷漾漾溶溶長復消濕掛松梢晴訝雪
曉漫沙際暖生潮孤飛出岫為霖早百折朝宗赴海遙
光影徘徊奇絕處微絃時向靜中調

題楊子恭先生所藏畫卷

懶尋捷徑問通津高卧南州樂隱淪姪可承桃勝有子
田堪供祭不干人江風山月諧清興野竹溪梅作近鄰
除却賦詩觀畫外更將何事累閒身

萬壑千岩路欲迷幽居更在亂峰西
野人茅屋秋臨水
農父村春夜隔溪霧雨山中同
豹隱煙波海上共鷗棲
續貂忝廁先親後展卷風前灑淚題

辛亥七月廿日晚出汴城南門

高槐細柳晚生涼綠蔓青蒿密覆牆
拳拳敦瓜長引蔓
離離新黍未登場千聲到耳蛩吟切
幾陣橫空鴈字長
衰憊若容辭享祿買牛歸去種山莊

夜趨尉氏縣倦憊新倉鋪

肩輿頓撼似乘車暫憩郵亭息病軀清露清風三伏末
殘星殘月五更初農家圃廢蓬科密野店燈明葦箔疎
縱是黃埃兼赫日尫羸何敢憚馳驅

雨中督民捕蝗

西風吹冷雨蕭蕭駭蚋驚蝗亂擲跳高壘低原泥沒脰
長坡漫地草齊腰鰲形餉婦鵲衣濕赤脚田翁鶴髮飄
安得縣官皆卓茂野無螟螣稼豐饒

涪川田家

榆繞村莊柳繞垣綠陰深處啓柴門
平蕪滿野牛羊卧落穗盈堦鳥雀喧
蓑笠雨晴當戶掛機梭夜靜隔鄰聞
餘年深覺為農好望斷南雲想故園

首山乾明寺

梵王樓殿首山陰布地銷殘劫後金
香閣晝昏槐柏暗衲衣秋冷薜蘿深
浮雲靜似高僧意流水清同長者心
佳境獨憐難久駐暫停征騎一登臨

裕州山中即景

曉露凝寒未結霜農家禾黍喜登場千林紅葉兼黃葉
幾樹青楊間白楊疊嶂層峰雲氣密奔流亂石澗聲長
山深盡日行人少野菊花開著處香

光州道中

陂陀丘阜間平岡相望人家隴阪長野水陂塘來雁鶩
村莊籬落散牛羊茨菇葉爛冬前雨枸杞苗枯露後霜
行郡計程餘兩月冷風寒雨過浮光

途中有懷寄內

浪逐虛名鎮別離，憑君莫怪乞身遲。
欲投組綬優游日，須及兒童長大時。
世事已知閒是好，病軀況與懶相宜。
黔婁已決歸田計，白首耕鋤定可期。

宿汝南田舍

荒原漠漠一茅茨，野老相迎半白髭。
道上塵埃埋馬足，簷間窻牖翳蛛絲。
平坡莫辨袁安塚，老樹空傳李愬祠。
極目黃蒿兼白葦，令人慷慨起遐思。

光州公館

半消殘雪濕苔磚過客來稀路自偏
木榻有塵皆鼠跡
土牆無篆不蝸涎隔年春意梅知早
大地風光柳得先
欲訊山川與民俗圖經殘缺欠重編

辛亥花朝

平分春色恰相停處處秋千日日晴
柳為迎風偏婀娜
花因臨水更分明尋芳已負嬉游興
對景徒添感嘆情
猶記南官曾獻藝白頭無補負恩榮

滄洲程隱君挽詩

脩然萬事不關心 日日尋僧傍竹林
雨後幽泉隨鶴汲 座中芳醕對花斟
秋風老圃千株橘 夜月虛窓一曲琴
惆悵閩南空谷裏 何人還解嗣遺音

題鳧繹歸耕卷

遺榮老去喜懸車 鳧嶧山中問故廬
數畝腴田皆種秫 一生清俸只收書
露畦麥穗童爭拾 煙壟瓜苗手自鋤
好共鄰翁濃作社 不妨沈醉有孫扶

和秋景韻

秋風

刁騷浙颿驟添涼
催得朝西綠橘黃
萍藻約開渾有力
芙蓉吹綻竟無香
未飄吳苑楓千樹
先隕隋堤柳數行
送得漁舟湖面去
釣絲撩亂颿波光

秋天

玉宇寥寥覆八垠
琉璃滑處不生塵
一痕新月梳浮黛
五色晴霞繡展茵
靈鵲有橋橫碧落
仙槎無路泛青旻
夜深濃露多如雨
洗出銀河一派新

秋雲

纔逐商飈濕客襟
又過蕭寺護松陰
清江亂渡低連水
紅樹輕籠懶作霖
掃葉僧驚迷去路
倚樓人訝失遙岑
晚來忽起長天外
頃刻濃遮日影沈

秋光

離離霜樹葉初乾
野色川容總帶寒
獵馬競嘶騰逸足
羈鷹快奮展修翰
黃蘆洲外斜陽渡
紅蓼灣頭亂石灘
極目園林蕭瑟甚
桂花飄盡菊花殘

秋峰

黛髻螺鬟聳晚涼層巔暑退似經霜金梯近倚丹霞影
玉洞長含紫霧香解夏林僧歸寺早趁晴樵叟入山忙
松巢擬結高高頂靜閱人間海與桑

秋意

庚金應候雨收初一葉飄飄墜井梧
芎服不宜臨水坐
藤床已愛背風鋪
衰容未入溪頭柳
爽氣偏凝石眼蒲
頗覺今朝非昨日
炎涼何苦自相驅

秋聲

只訝潮音海上來
那知風雨在高槐
號呼奮發悲兼怒
曲調低昂去復迴
豈待胡笳清淚落
寧須畫角壯心摧
北窻況有脩脩竹
一夜聽殘白髮催

秋色

寒鴉候雁滿晴川
點綴郊原罨畫天
老葉著霜渾似染
殘荷出水不成錢
纍纍橘柚斜陽裏
嫋嫋芙蓉淺渚邊
門外晚晴詩景富
吳歌一曲採菱船

秋氣

蘋末風來拂樹林
砭人肌骨冷森森
銀釭向夜侵燈影
玉塞連朝結野陰
紈扇淒涼先入匣
琵琶哀怨漫沾襟
何須慷慨悲搖落
呼酒香橙樹下斟

秋懷

自憐詩酒半生耽
痛飲狂吟老尚堪
知己更誰如鮑叔
懷人惟我似羊曇
菱花羞向燈前照
菊蕊慵將客裏簪
強欲登高望丘壑
白雲迢遞隔天南

秋波

茫茫淼淼渡無舟
遠浸煙莎沒盡頭
綠葦叢邊拳一鷺
白蘋花外戲雙鷗
斜陽曬翅鷓鴣飽
新漲漫天舴艋浮
漁父不知魚不食
尚乘涼月坐垂鈎

秋思

雙蛾長蹙怨離居
不見銀箋寄到書
清淚清愁孤枕上
殘鐘殘夢五更初
已無佳句題紅葉
謾有餘香在繡襦
怕近黃昏聽絡緯
更堪雙杵動村墟

秋陰

拂地連天障翠微，吹開渾不怕風威。
梧桐失影空金井，萸菊籠香艷綺闌。
清晝每疑涼雨至，長時只訝濕雲飛。
自從過却重陽節，少見瞳瞳日色輝。

秋雨

滴瀝空堦不斷鳴，淋漓徹夜到天明。
殘荷只送蕭蕭韻，落木仍兼颯颯聲。
竹榻寒驚僧夢醒，松窗涼助客吟清。
杜陵屋漏無乾處，喜見晨霜早放晴。

秋晴

九月江湖潦水清
木綿花吐雪爭明
寒來處處催砧響
社酒村村沸鼓聲
禾黍郊原肥雉兔
菰蒲洲渚聚鷗鵲
遙天似鏡無纖翳
只有聯翩雁影橫

秋月

白波浮出碧波晴
上到天心覺倍明
香霧雲鬟人搥練
涼風露榭客調笙
劉琨塞外憑欄嘯
張渭湖中載酒行
曾是廣寒攀桂手
龍鍾猶想賦登瀛

秋涼

氣候蕭條漸欲霜
家家整頓夾衣裳
鷹爭刷翮超雲海
鳥怯浮波立石梁
濃露一宵催茉莉
長風幾日悴枕櫳
吳儂只憶江南好
紫蠟初肥白酒香

秋蟬


山蛸渾未覺涼生
猶韻金風咽復鳴
總為螳螂能愛惜
却教蟋蟀讓淒清
難諧趙瑟秦箏調
慣和樵歌牧笛聲
按盡宮商黃葉裏
那能不遣客心驚

秋信

梧桐新月照空床
紈扇西風淚數行
好夢只隨鐘共斷
閒愁偏與夜爭長
最憐牛女同今夕
却恨參商各異方
薄命盼盼并小小
料應不似我淒涼

秋鴈

幾陣參差度驛樓
嗚嗚肅肅下滄洲
涼波挽共鴛鴦浴
煙渚晴隨鵲鷺遊
遠去解傳邊使信
冥飛恐墮弋人謀
蓼花菰米滿湘岸
飽食何妨伴野鷗



運甍漫稿卷五